

趙城縣志卷之四

山川

霍山在縣東三十里一名太岳山禹貢至於太岳卽此國語稱景霍史記稱霍太山皆是也古爲冀州鎮今稱霍嶽中鎮山高數百丈縣衍二百餘里南接洪洞北跨靈石霍州東抵沁源岳陽而隸縣境者八九山有白皮松多數百年物大者可十人圍又有五色花雙頭蛇萬年燈其最深處林壑陰翳春夏間猶有積雪

山自靈石縣東南四十里縣山南麓歷霍州之東迤邐

而南直抱縣境東接岳陽縣之蓮花山黨家山南接洪洞縣之九箕山皆其支麓也山頂有峯上圓名觀堦峯趙襄子祠三神於百邑使原過主之世謂其處爲觀阜觀堦當卽觀阜之訛入山五里有中鎮廟喬宇記云繇谷口入至鎮下其形勢可伯仲於諸嶽冢秀而翠翼拱而墮廟在山麓廟外皆山分脉合抱以繞其前古松數株如青幢鐵幹枝皆東向巔去廟尙三十里

霍山周時卽列四鎮漢制天子祭五嶽四瀆其他山川郡國自祭之時無四鎮之名故霍山不著祀典隋復祀

四鎮以沂山爲東鎮吳山爲西鎮會稽爲南鎮醫無閭爲北鎮惟霍山稱晉州鎮不在四鎮之列唐別稱爲西北鎮見唐地理志其時四鎮亦無霍山至宋乾德中有司奏脩祀典始以霍山爲中鎮自是五鎮並稱不稱四鎮矣至今沿之

霍山之名不一南嶽衡山及安嶽霍山縣天柱山皆名霍山爾雅霍山爲南嶽注卽天柱山潛水所出也疏衡山一名霍言萬物霍然大也漢武帝移嶽神於天柱又名天柱亦爲霍左傳哀公四年襲梁及霍注梁南有霍

陽山蠻子之邑也。則又一霍山矣。

山有香谷口覆柏灣雙門峯紅岩谷桃花谷葡萄坪飛
雁峯盤龍峯歡喜嶺環翠峯競秀峯寶冠峯筆架峯摩
天峯鉢盂岩萬年坪天馬峯芙蓉嶂天竺峯鐘鼓峯香
案峯旌揚峯馬鞍峯滴水岩撼門峯嵒嵒峯捫天嶺探
月峯香爐峯靈龜岩老龍背仙人石鳳凰岩連珠峯青
霞嶂萬錦坡玉柱峯朝陽洞蓮華山並見韓魁霍山遊
記又有玉笈山倚劒峯聯珠岡天柱峯日觀峯仙掌山
飛鸞嶂等名則李升階所增也。

李志中鎮五圖其一香谷流泉繇城東二十里苑川村
行數里許至谷口爲入鎮先路遠聽流水琤琮如漱寒
玉出林見數條垂練從小渠瀉落立馬久之眞足浣淪
性靈矣其二蒼崖刻玉渡小澗從谷口入取道澗左兩
崖石皆嶙峋堆垛色似黃玉諦視之恍惚岫嶁文字其
崑刀所割而爐煉之餘歟其三雲屏展誥緣崖行數里
當前絕壁疑若無路轉側徙倚澗底水聲已過馬尾矣
忽天際展一屏約里許微雲橫抹莫覩其巔遠望如誥
軸焉其四玉女囊琴雲屏隔澗又里許一峯娟麗如玉

女狀下一小峯遠視之若無有至則卓立腰股間儼然
綠綺琴囊也其五仙官納舄將至鎮一小山其形似履
四圍羣峯攢簇時有雲氣擁護最近者若冠裳兀坐欲
納舄然

休糧山在縣東五十里相傳休糧菩薩說法於此打鼓泉
在其巔

十二松峯在縣東三十里俗呼喝石庵山上下皆植松柏
林壑映帶最爲幽勝

李志十二松峯亦霍山也至山口得小溪水濺濺可涉

緣溪行山徑曲折兩旁崖石攢簇如丹樓絳閣玲瓏萬狀知其中別一天地矣行二里漸開朗四圍峰如卓筆皆白皮松層層相比其隙處微露嶙峋若吳下好手堆垛就者轉仄徑過飛仙橋崖壑益異橋兩堦皆駕飛崖湍流相夾鳴琴戛玉吾以天台石梁不是過也

青條峪在縣東四十五里

范霍峪在縣東南五十里其巔有馬跑泉

以上四山皆附霍而異名者

羅雲山在縣西四十里卽姑射山自汾西縣迤邐而南歷

縣境六十餘里西南接蒲縣洪洞界岩壑深窅時有雲氣其間絕勝處人跡罕到說者以爲多異獸云

太平縣志姑射山在縣西十五里自北而南直抱縣境東對汾水若左右翼汾西青山趙城羅雲臨汾九孔平山襄陵三嶺皆姑射也

出佛峽在縣西四十里卽羅雲山石峽也山有石皆似佛首

舊志羅雲山南有五峯峯各有臺人謂之小五臺北臺下一洞其深叵測俗傳可通大五臺南臺下則出佛峽

也有石井泉甚甘美寒山捨得嘗遊此

出佛之名舊志謂取石之形似或言乾隆間有二獵者至峽南逐一狐入穴掘之得大小銅佛數百謀碎之以歸爲土人偵知而止今其佛藏國兒上寺中然峽之得名不自乾隆時始姑存其說以備覽

明珠山在羅雲山東北山西南溝中有龍泉

婁山在羅雲山南卽羅雲之支麓也出佛峽在其北

汾水在西門外里許自霍州南流歷縣境五十餘里入洪洞界近河村落多引爲渠

水經注汾水又逕趙城西南繆王以封造父趙氏自此始也汾水又南霍水分焉案汾水源出寧武府寧武縣西六十里樓子山卽管岑之別嶂也南流歷靜樂交城陽曲太原徐溝文水平遙介休孝義靈石至霍州南辛置村入縣北境南流逕北湓澗村西霍州義沃村水西流至縣境注之又南逕北二十里舖一名益呂舖北小澗水自左注之又南納轟轟澗水又南逕窰子鎮西嵇李二村東鎮南北二澗水自左注之許村澗水自右注之又南逕縣治西北左納北大澗水又南逕縣治西南霍水

西流注之又南歷好義安定登臨石止馬牧等村之東
瓦窰頭古屯王開上下紀落等村之西南小澗水及南
大澗水先後注之又南入洪洞縣界繇洪洞臨汾襄陵
太平曲沃絳州稷山河津至榮河縣北入於河
霍水出縣東南四十里霍山之麓西流入汾

水經注霍水出霍太山發源成潭漲七十步而不測其
深西南經趙城南西流注於汾水案霍水源出沁源縣
西南流至岳陽縣南滲水灘伏流八十里至縣東南霍
山下復出渟泓不半畝而混混時出不可涯涘一口極

水經集注卷之四
狹駕流作橋亭覆其上名分水亭亭之下有鐵柱十一
卽洪趙兩邑分水處也

北大澗水出縣東北四十里觀音溝屈曲西南流五里逕
關口村東南又五里逕苑川村西又七里逕澗頭村東又
三里逕王村莊南又三里逕耿壁村南又五里逕侯村莊
北折而西北流二里逕鴉兒崖又七里逕磨頭村西北又
二里至縣北後樓入於汾

北小澗水出縣東北二十里霍山谷中西流七里逕上跑
蹄村南又三里逕下跑蹄村西南又八里至縣北二十里

益昌舖入於汾

縣北二十里溢澗村北坡下亦有小澗出霍州義沃村西南流至縣北境入汾

後樓小澗水出縣東北二十里仇池村西南和尙溝西流六里逕南焦家原又六里逕官莊村西北又三里至縣北後樓合大澗水入汾

窰子鎮南北二小澗南澗水出仇池村東繇北焦家原南西流七里逕後溝村東南又西北流二里至鎮南入汾北澗水出仇池村西三官廟前西流七里逕南溝裏村南又

七里至鎮北入汾

南大澗水出縣東四十里大峪溝西流六里逕楊家莊東
屈曲而南十里逕胡坦村東又五里逕伏牛村西北又五
里逕小胡麻溝北又二里逕辛堡溝南又二里逕董家溝
東又二里逕胡麻溝西又西南流六里至縣南十八里下
紀落村南西達於汾

南小澗水出縣東三十五里尖岩懷

又名介霍

西流五里逕柏

店兒北又五里逕灰坡裏南又三里逕赤霍裏北又三里
逕溝南村北又七里逕侯村莊南得侯村澗水合之又西

南流入里至縣南五里古屯村北西達於汾

郭壁澗水出縣東南四十里賈家山西南流六里逕梭林
北又五里逕槐樹莊西北又七里逕後河頭東又三里逕
營田堡北又二里逕板塔村又五里逕早覺村南又二里
逕嚴家莊南又三里逕北秦村東南折而南流入洪洞界
後河頭上流有石橋跨之卽霍泉自東而西過水之處
俗呼大通堰

石姑澗水出縣東南七十里野雀溝南流遶霍山東南麓
折而西流二十里逕高崖村北又十里逕道覺村東復折

而南入洪洞界

赤壁水出縣東五十里霍山谷中南流至岳陽縣西漏崖伏流三十里復出合澗水

轟轟澗水自汾西縣境東流至縣西北十五里北石明村西折而東北流達於汾

許村澗水出汾西縣界又名舞羊澗山上有小泉雨集輒成大河自縣西北許村東流十里入於汾

趙城縣志卷之五

城池

邑之城不足志也曷言乎不足志曰嘉慶六七年間圯於水者數矣今猶未復其舊也故曰不足志也然竟可以不志乎曰謹封守嚴捍禦令之責也且完固之城保障易損壞之城保障難畧之烏可也建城何始曰始唐之麟德二年通志作元年前此無建城者乎曰有之然故址無存籍氏亦無紀也今之城猶唐之舊治乎曰明正統十四年知縣何子聰徙而東矣距舊城五里其徙之何避水患也城之制何周